

- राज्य मांय बेमौसम बिरखा अर बाढ़ रे कारण फसलां ने व्हीया नुकसाण रा मुआवजा रा रूप मांय 26 सौ करोड़ रिप्या री सब्सिडी मंजूर।
- भारत अर यू.के. रो भेळो सैन्य अभ्यास 'अजेय वॉरियर' री आठवीं कड़ी आज ऊं महाजन फील्ड फायरिंग रेंज मांय सरू।
- वी. श्रीनिवास आज राज्य रा नुवा मुख्य सचिव रा रूप मांय कामकाज संभाळ्यो— राजस्थान री विकास दर बधावण ने प्राथमिकता बताया।
- सांसद खेल महोत्सव रो आज ऊं जयपुर रा सवाईमानसिंह स्टेडियम मांय सरूआत।

000

राज्य सरकार बेमौसम व्ही बिरखा अर बाढ़ ऊं साखां ने व्हीया नुकसाण रा मुआवजा रा रूप मांय काश्तकारां ने 26 सौ करोड़ रिप्या रा आदान सब्सिडी दी जाएला। आपदा राहत मंत्री डॉ. किरोड़ी लाल बतायो के सरकार रा ई फैसला ऊं 43 लाख ऊं बत्ती काश्तकारां ने फायदो व्हेला। आ रकम वां काश्तकारां ने दी जाएला जिण री 33 फीसदी अर इण ऊं बत्ती फसल खराब व्ही है। इण रे अलावा, सरकार सार्वजनिक परिसंपत्तियां री मरम्मत अर पाछी बणावण सारू 1 हजार करोड़ रिप्या ऊं बत्ती री रकम मंजूर करीजी है, जिण ऊं सड़कां अर सरकारी भवन सुधार्या जाएला। आपदा रे कारण व्ही मौतां रा मामला मांय मरण वाळां रा पिरवारां ने ई 4-4 लाख रिप्या री मदद करीजी है।

000

उत्तर क्षेत्रीय परिषद री बैठक आज हरियाणा रा फरीदाबाद मांय गृहमंत्री अमित शाह री सदारत मांय व्हे रही है। उत्तर क्षेत्रीय परिषद मांय राजस्थान समेत हरियाणा, हिमाचल प्रदेश, पंजाब, दिल्ली, जम्मू अर कश्मीर, लद्दाख अर चंडीगढ़ राज्य अर केंद्र शासित प्रदेश भेळा है। मीटिंग मांय राजस्थान रा मुख्यमंत्री भजन लाल शर्मा, पंजाब रा मुख्यमंत्री भगवंत मान, हरियाणा रा मुख्यमंत्री नायब सिंह सैनी, हिमाचल प्रदेश रा मुख्यमंत्री सुखविंदर सिंह सुक्खू, जम्मू अर कश्मीर रा उपराज्यपाल मनोज सिन्हा, दिल्ली रा उपराज्यपाल विनय कुमार सक्सेना, जम्मू अर कश्मीर रा मुख्यमंत्री उमर अब्दुल्ला, दिल्ली री मुख्यमंत्री रेखा गुप्ता अर ठावा अहलकार ई हिस्सो लेवे। बैठक रे दौरान, दिल्ली लाल किला विस्फोट रा पीड़ितां ने श्रद्धांजलि देवण सारू एक मिनट रो मौन राख्यी ज्यो। बैठक मांय राज्य सरकारां रे बीचे तालमेल, पाणी रा बंटवारा रो मुद्दों अर विकास रा कामां माथे बतळ व्ही।

000

सेना प्रमुख जनरल उपेंद्र द्विवेदी कह्यो के जम्मू-कश्मीर मांय आतंकवादी गतिविधियां मांय उल्लेख जोग कमी आई है। नुवी दिल्ली मांय चाणक्य रक्षा संवाद रा उद्घाटन जळसा मांय बोलता जनरल द्विवेदी कयो के भारत, किण ई तरह रा युद्ध रो जवाब देवण सारू तियार है। वणा कयो के जो लोग आतंकवाद ने बधावो देवेला अर वां ने प्रायोजित करेला अर वां रो करारो जवाब देवेला।

000

सेना प्रमुख कयो के ऑपरेशन सिंदूर तो फगत एक ट्रेलर हो जो 88 घंटां मांय पूरो व्हे ग्यो। वणा कयो के भारत भविष्य मांय किण ई हालात सारू तियार है। सेना प्रमुख कयो के जे पाकिस्तान कोई गलत काम करयो तो भारत रा सशस्त्र बल, पड़ोसी देश ने सिखावेला के भारत रे साथे किण जिम्मेदारी साथे पेश आवणो है।

000

भारत अर यूनाइटेड किंगडम रे बीचे भेळा सैन्य अभ्यास 'अजेय वॉरियर' रो अठवीं संस्करण आज बीकानेर री महाजन फील्ड फायरिंग रेंज मांय सरू व्हीयो। ओ दो साला अभ्यास तीस नवंबर ताई चालेला। ई सैन्य अभ्यास

मांय दोन्यू देशां री सेनावां रा 240 सैनिक हिस्सो ले रिया है। भारत कानी ऊं इण मांय सिख रेजीमेंट रा जवान भेळा है। कर्नल नीरज बेनीवाल बतायो के इण रो खास ध्यान शहरी हलका मांय आतंकवाद-रोधी अभियानां माथे है। ओ संयुक्त राष्ट्र जनादेश रे तैत करयो जावे। अभ्यास रो मकसद दोन्यू सेनावां रे बीचे ठावा युद्ध हुनर अर अनुभव ने बांटणो है अर करडी हालात मांय साथे मिलने काम करण रा बूता ने बधावणो है।

000

प्रदेश मांय स्टार्टअप्स कार्यक्रम रे तैत सात हजार एक सौ ऊं बत्ती स्टार्टअप्स ने मदद दी गई है। आं स्टार्टअप्स मांय एक हजार करोड़ रुपया ऊं बत्ती रा निवेश आया है, जिण ऊं राज्य मांय 42 हजार ऊं बत्ता नुवा रूजगार पैदा व्हीया है। 'आईस्टार्ट' पोर्टल अबे उद्यमियां सारू वन-स्टॉप गेटवे बण चुक्यो है, जो वां ने फंडिंग, ट्रेनिंग अर मुफ्त इनक्यूबेशन जैसी सगळी जरूरी सुविधावां एक ही ठोड माथे मुहैया करा रियो है।

000

भारतीय प्रशासनिक सेवा रा ठावा अहलकार वी. श्रीनिवास आज राज्य रा नुवा मुख्य सचिव रा रूप मांय आपरो कामकाज संभाळ लियो। जयपुर रा शासन सचिवालय मांय कोई साढ़े तीन बज्यां जावण वाळा मुख्य सचिव सुधांश पंत वां ने कामकाज सूंयो। ई मौके प्रशासनिक अर दूजी सेवा रा केई अहलकार मौजूद रिया। पछे खबरनवीसां ऊं बतळ मांय श्रीनिवास कयो के प्रदेश री विकास दर ने बधावो देवण अर विकसित राजस्थान 2047 रा संकल्प ने धरातल माथे उतारणो वां री प्राथमिकता रहवेला। वणा कयो के राजस्थान रा केई नवाचारां ने केन्द्र सरकार ई अपणाया है। जिण हलका मांय प्रदेश रो प्रदर्शन कमजोर है वां ने ई सुधारण सारू कोशिश करी जाएला।

000

इण रे पछे सचिवालय मांय व्हीया कार्यक्रम मांय जावण वाळा मुख्य सचिव सुधांश पंत ने विदाई दीरीजी।

000

अजमेर मांय ख्वाजा मोईनुद्दीन हसन चिश्ती री दरगाह रा बणाई चुणायी रा कामां रा बारा मांय जयपुर मांय आज एक महताऊं बैठक व्ही। इण री सदरत अल्पसंख्यक कार्य मंत्रालय रा सचिव, डॉ. चन्द्रशेखर कुमार करी। बैठक मांय अल्पसंख्यक मामलात महका रा अपर मुख्य सचिव अर सैलाणी महकमा रा प्रमुख सचिव समेत ठावा अहलकारां हिस्सो लियो। मीटिंग मांय दरगाह परिसर मांय हिफाजत, सफाई अर जातरी सुविधावां सारू न्यारा न्यारा महकमा रा संसाधनां ने एक साथे लावण माथे जोर दीरीजी। सचिव डॉ. कुमार प्रधानमंत्री जन विकास कार्यक्रम री परियोजनावां अर 'उम्मीद' पोर्टल माथे वक्फ डेटा अपलोडिंग री प्रगति री ई खास समीक्षा करी।

000

जयपुर रा सवाईमानसिंह स्टेडियम मांय आज सांसद खेल महोत्सव रो शानदार आगाज व्हीयो। उपमुख्यमंत्री दिया कुमारी दीप जगा र कार्यक्रम री सरूआत करी। उपमुख्यमंत्री आपरा भाण मांय कयो के खेल आपा ने फिट राखे है। वणा खिलाडियां ऊं कयो के जीत-हार खेल रो हिस्सो है, जिण ऊं निराश होवण री बजाय और ताकत रे साथे आगे बधणो चाहिजे। वणा कयो के प्रधानमंत्री नरेंद्र मोदी बरोबर खिलाडियां ने बधावो दे रिया है। दिया कुमारी इण ने मंच रो अनुशासन, टीमवर्क अर आत्मविश्वास विकसित करण रो मौको बताया। सांसद मंजू शर्मा ई मौके कयो के ई आयोजन रे मार्फत केई नौजवानां ने हुनर दिखावण रो मौको मिलेला।

000

वणा 'वोकल फॉर लोकल' रो संदेश देवता नौजवानां ऊं स्वदेशी उत्पादां ने काम मांय लेवण रो संकल्प लेवण सारू अरज करी। ई मौके खेल मंत्री राज्यवर्धन सिंह राठौड़ समेत केई मंत्री अर विधायक मौजूद रिया।

000

राज्य मांय केई ठोडां ठंड रो असर तेज व्हे ग्यो है। लारली रात माउंट आबू मांय पारो जमाव बिंदु माथे पूग ग्यो। सीकर जिला रा फतेहपुर मांय कम ती रो तापमान 4 दशमलव 9, सीकर मांय साढे 5, नागौर मांय 5 दशमलव 6, लूणकरणसर मांय 5 दशमलव 8, करौली मांय 7 दशमलव 6 अर सिरोही मांय रात रो पारो 7 दशमलव 7 डिग्री मापी ज्यो। घणखर ठोडां दिन रो पारो 25 ऊं 29 डिग्री रे बीचे मापी ज्यो। मौसम केंद्र जयपुर सीकर मांय आवता तीन दिन शीतलहर सारू चेताया है। इण रे अलावा झुंझुनू, टोंक, कोटा अर नागौर मांय आज अर काले शीतलहर चालण रा आसार है। उठी ने ठण्ड बधण रे साथे ही सैलाणियां री आवक बधण लागी है। म्हारा खबरनवीस बतायो के आं दिनां माउंट आबू सैलाणियां ऊं गुलजार है।

000

भीलवाड़ा सांसद दामोदर अग्रवाल आपरा पिरवार समेत एस.आई.आर फॉर्म भरने मतदाता जागरूकता रो संदेश दियो है। वणा कयो के एस.आई.आर. ऊं वोटर लिस्ट मांय दोहरा नामां जैस्सी सगळी गडबडियां खत्म व्हे जाएला। वणा आज लोगां ऊं ई कार्यक्रम मांय मदद री अरज करी। पाली मांय ई **मतदाता सूची विशेष गहन पुनरीक्षण अभियान** रे तैत फॉर्म भरण सारू न्यारा-न्यारा हलकां मांय शिविर लगायी ज्यो। श्रीगंगानगर जिला चुणाव अहलकार डॉ. मंजू सादुलशहर विधानसभा मांय एसआईआर रे तैत व्हे रिया कामां ने देख्या।

000